

La biblioteca de Vich, la majon di libres

Via per l'an 2008 l'é stat dat fora 13.690 libres a d'imprest. Le femene le n'à tout passa l 68%



Barbara Pederiva e Inge Detomas portant con pascion e professionalità l lurier te la biblioteca de Vich.

Vich - La é restada serada per valch di de più che l solit ma istesc la majon di libres de Vich resta l pont de referiment cultural e sozial per gran part di letores de la val, tant gregn che picoi.

Via per l 2008 la biblioteca, reta con gran competenza da Inge Detomas e Barbara Pederiva, à dombrà l bel numer de 1.372 scric ite, de chisc 216 i é neves. L 21,94% di scric ite l'é sentadins de Vich, l 27,84% enzeve l'é jent da Poza e l 15,31% é de autres paijes de la val o de la provinzia. L 34,04% é da fora provinzia donca ghesé che rua te val per si vacanze o lurieranc de sajón, chel che resta, donca l 0,85% l'é enc o scole.

L 65% di scric ite l'é femene, che le à tout a d'imprest l 68,09% di libres, n dat che conferma l fat che le femene lec de più che i omegn e le va de più te majon di libres magari per compagnar si bec.

Auter dat che desmostra la viveza e l'aprijiamet de la biblioteca de Vich l'é l numer de libres dac a d'imprest, en dut 13.690. Enceben che n sie stat dat fora 880 de manco che te l'an 2007, resta semper n bon numer, più aut respet a le altre doi biblioteche de la val. De chisc, 4.714 l'é libres per bec e joegn, 1.475 se referesc a films, corsc o documentares DVD e 189 l'é stat le VHS, per gran part cartoons per bec. Ai avantores che à manco che 14 egn, donca bec e joegn, ge é stat dat a d'imprest 4.380 libres, presciapech n terz del total.

L'é ai bec defat che se ouc la maor part de le scomenzadive endrezade ence via per l 2008 da la biblioteca de Vich desche i spetàcoi de teater per le scoline col "Gruppo del Lelio" de Bassan (un d'aisciuda e un d'uton), le leture animate endrezade per i picoi ghesé de la majon di libres via per l'istà e le leture animate per i scoles de la scola popolare de Vich col "Teatro Telaio" de Brescia. Apede a cheste

proponete per se tegnir apede i picoi letores, la majon di libres à pissà ence ai più gregn. Ai 8 de marz de l'an passà Barbara l'à endrezà n moment resservà a le femene con leture e compagnament de mùsega, che é stat dassen aprijà. Dapò l'é stat sport l cors per emparar a cojir e l cors de lengaz rus.

Recordon che del 2008 la majon di libres de Vich à festejè si 25 egn de atività e per chest cedeàn l'à endrezà la prejentazion del nef liber del scrittor Stefan Dell'Antonio Monech dal titol "Neve". Na bela ocajion per far cognoscer n autor de gran spessor de noscia val ma ence per slariar fora l gust e la pascion per l lejer. Se tor n liber, l sfoar fora, l lejer, dasc n gust e na lingia de sensazion personale che resta tel temp, che se fissa tel ciaf e tel cher e te mena te tempes e lesc dalonc e descognosciui. I le cognosc ben cheste sensazion i 96 letores "desciadené" de la majon di libres de Vich che via per l 2008 se à tout a d'imprest ogne un passa 29 libres, che vel dir più che doi al meis. I gregn letores, chi che à let da 13 a 29 libres, é stac 192, i letores usuai, che à let da 7 a 12 libres, é stac 273 e passa 800 avantores é stac classifiché enzeve letores ocajonai ajache i se à tout a d'imprest da 1 a 6 libres.

I libres, desche i film, più lec e che à fat più rejonar, ence a livel nazional, l'é stat: "Il cacciatore di aquiloni" dat fora 21 oute, "Harry Potter e i doni della morte" 20 oute, "Cars" (n liber per bec) tout a d'imprest 19 oute, "Mille splendidi soli", 19 oute e "Gomorra" dat fora 15 oute.

Amò na curiosità: l 24,84% di libres dac a d'imprest é jit a jent da Vich e demò l 24,10% a foresc. Da chiò vegn fora che l 75,90% di libres é jic a jent de la val o de la provinzia. Segur n ben resultat che conferma l bon lurier fat de le doi responsàbole Inge e Barbara, nò demò per i sentadins de Vich ma ruan a pojar n liber sul comodin de n bon pecia de jent da duta la val.

Monica Cigolla



Inge Detomas à semper vardà che la biblioteca sie n pont de referiment per i letores ensin da picoi.